



INTRODUCZIUN

DAD ANDRI CASANOVA-BAUMGARTNER

Sche nus legin e ponderein bein, tgei che quels vignerols fan enteifer quella semeglia, sche dat ei bein mo ina risposta: Quels ein dil tuttafatg orda senn! Mo, tgi ein els e tgi ein ils fumegls ed il feagl?

Tenor musters dil Veder Testament (cf. Jes 5,1–7; Ps 118,22) eis ei evident ch'ils fumegls simboliseschan ils profets persecutai. Ed ord optica dil Niev Testament stat il feagl dil patrun secapescha per Jesus. E per capir, tgi ch'ei da colligiar cun ils vignerols, dat igl evangeli tenor Mattiu ual sez ina risposta: «Udend sias semeglias, han ils premsacerdots e farisès encurschiu ch'el plidava dad els» (Mt 21,45). Pia fuvan els quels tals che semettevan encunter la veglia da Diu, encunter uorden e justia.

Pia regorda la semeglia nus a duas caussas: 1) Il reginavel da Diu munta justia. Egoissem e violenza audan buca neuheu. 2) La crudeivla mort da Jesus ei daventada entschatta per ina admirabla ovra dil Segner. Ed en quell'ovra essan nus ils vignerols. Lein pia ver quitau in da l'auter e purtar bien fretg.

EVANGELI

Mt 21,33–43

³³Tedlei in'otra semeglia. Ei fuva in proprietari. Quel ha plantau ina vegna, circumdau ella cun ina seiv, cavau lien in torchel ed erigiu ina tuor. Lu ha el schau a tscheins ella a vignerols ed ei ius egl jester. ³⁴Arrivaus il temps da raccolta, ha el tarmess ses survients tiels vignerols per retscheiver ils fretgs. ³⁵Mo ils vignerols han cargau ils survients: In han ei bastunau, l'auter mazzau ed in tierz encarpau. ³⁶Puspei ha el tarmess auters fumegls, pli biars che l'empremaga, mo ei han fatg cun quels il medem. ³⁷La finala ha el tarmess siu feagl tier els cul patratg: Miu feagl vegnan ei bein a respectar. ³⁸Mo vesend il feagl, han ils vignerols detg in siper l'auter: Quei ei igl artavel. Vegni! Lein mazzar el, e sia ierta ei nossa. ³⁹Ed ei han tschappau el, han fiers el ord la vegna e mazzau el. ⁴⁰Tgei vegn bein il patrun dalla vegna a far cun quels vignerols, cura ch'el tuorna? ⁴¹Ei han rispundiu ad el: Quels miserabels vegn el a far ir malamein alla malura, ed el vegn a schar vi sia vegna ad auters vignerols che dattan ad el ils fretgs a dretg temps. ⁴²Jesus ha detg ad els: Veis vus aunc mai legiu ellas scartiras:

Il crap ch'ils baghegiaders han rufidau,
lez ei daventaus il crap da cruna.
Quei ei l'ovra dil Segner,
ed ella ei admirabla en nos egls.

⁴³Perquei ditg jeu a vus: Il reginavel da Diu vegn retratgs da vus e confidau ad in pievel che porta ses fretgs.